

Regio.
Nomina, & unde deducta.

Situs.
Cœli qualitas, & Soli fertilitas.

Animalium varietas.

Imperium Majorum.

Urbium nomina.

Borussiam ultimæ Germaniæ oram a Borussis populis nomen obtinere, Erasmus Stella auctor est. Hi, teste Ptolemæo, ad Riphæos montes, ubi in Septentrionem fusius excurrunt, nec longe qua Tanais ex eis erumpit, confederunt: & sedium suarum pertasi, valida manu, se in hæc loca effudere, & a suo nomine Borussiam totam regionem dixerunt, quæ nunc una litera extrita & altera mollius expressa, Prussia dicitur. Borussia a Vistula amne, quem ad Occidentem terminum habet, incipiens, sinumque Maris Balthici qui Septentrionale ejus latus ambit, percurrentes, ad Ortum *Alanos* habet, ad Meridiem *Hamabios*. Aëre fruitur amœno, sed frigidior. Regio omnis est fecundissima, & finitimis Provinciis longe beatior: Ager Frumenti feracissimus quod Polonicum & Lithuanicum bonitate excellit. Abundat Melle & Apibus æque ut ceteræ regiones Septentrionales. Est in ea quoque Pecorum ingens vis, multa ac copiosa venatio. Ingentes enim vastæque Silvæ multa Ferarum genera alunt. Quæ præter Vrsos, Apros, Cervos, quibus abundant; proferunt Vro excellenti vi & velocitate, vulgo *Bubalos* vocant. Gignunt & Bizontes jubatos, è Boum silvestrium genere. Equos etiam silvestres quorum carne Incolæ vescuntur. Gignunt & Alces quos vulgo *Elandes* vocant: ac *Idæides* vulgo Martes. Vsq̃ue ad tempora Friderici 11 Imperatoris plerique Borussi Idololatæ fuerunt, quo imperante anno MCCXV Crucigeri Ordinis Teutonici eos vicere, Religionemque Christianam docuere. Postea Provinciæ & Civitates Borussia anno MCCCCXIX Crucigerorum moti avaritia & ferocia, ad Casimirum Poloniæ regem defecerunt. Post annos triginta octo repetita defectione Marieburgum cum aliis castellis & urbibus regi venderunt 476000 florenis. Quum autem Marianus obedientiam Regi recusarent, tamdiu utrimque vario Marte dimicatum est, donec universus tractus Albertus Brandenburgico ultimo Crucigerorum Magistro cecidit, qui etiam Cracoviæ a Sigismundo Poloniæ Rege Princeps secularis & Eques auratus factus est. Divisam autem fuisse Borussiam tradunt in duodecim Ducatus a Veneduso principe, quorum nomina hæc: *Sudavia, Sambia, Natangia, Nadrovia, Slavonia, Bartoniam, Galindia, Warmia, Hogerlandia, Culmigeria, Pomesania & Michloviam*. *Sudavia* prorsus a Crucigeris ita vastata est, ut ex nobili Ducatu hodie vix septem pagi, & quidem viles, in Luptaviensi territorio supersint. In *Sambia* sunt Civitates plures, *Lebenicht*, exstructa anno M C C LVI: *Kneyback* anno M C C C LXXX: *Regius Mons* M C C LX: *Fischusia* anno M C C LIX: *Lechster* anno M C C LXXXIX: *Mulmelsburgia* anno M C C LXXXIX. In *Natangia* civitates sunt *Valdonia, Girania, Centia, Crenenburga, Heiligenbeil, Fridlandia, Schippenbeilia, Brandenburga*. In *Nadrovia* vix aliquot casæ & tuguriola supersunt: cetera vastata sunt. In *Slavonia* sunt *Ragneta, Tilsa, Renum, Liccovia, Salavia, Labia, Tapia, Vintburgia, Christaderder, Baytia, Cestia, Norbeitia, Vensdorf, Angenbourgia & Dringofordia*. In *Bartoniam* sunt *Nordenburga, Johansburga, furgburga, Inseburga, Richtenerder, Bartoniam & Rhenum*. In *Galindia* sunt *Orteleburgum, Rastenbourgum, Neyburgum, Passenhumia, Dreschloviam, Lucia & Lutzenburgia*. In *Warmia* sunt *Ressel, Sireburg, Bischoffstein, Wartenburg, Allensteyn, Melsatia, Helfberga, Wermeditum & Gustadia*. In *Hogerlandia* sunt *Brandenburgum, Tolkiemit, Munibusia, Scharpovia & omnium maxima Elbinga*, in littore maris exstructa, splendidis civium opibus & mercatorum frequentia celebris.